

18.3.88

Clemens Monn-Gamboni, Sedrun



(A.S.) Mesjamna, ils 27 da schaner 1988, ha il zenn grond dalla baselgia da s. Vigeli a Sedrun annunzia la mort dil prezaiu Clemens Monn-Gamboni. Cun gronda tristezia prendein nus enconuschientscha dalla nova. Suenter cuorta malsogna ha il Tuttupussent liberau il Clemens dils mals e clamau el en siu reginavel.

Affonza e scolaziun

Clemens ei naschiu ils 12 da fevrer 1930 sco 8avel affon d'ina numerusa famiglia purila a Cavorgia. Ils geniturs, Hans Giachen Monn e Turtè Monn, naschida Beer, han tratg si cun gronda diligenza e capientyscha ina famiglia da buca meins che 14 affons. Era han els stuiu surporstar la greva sort d'haver 3 baretts e 2 affons ch'ein sparti. En caudla cuminanza ha il Clemens astgau passentar sia affonza.

L'emprema entochen la 6avla classa frequenta Clemens a Cavorgia tier signur Cavegn, da Breil, e mistral Theofil Schmid. Silsuenter serenda el a Schluein per absolver ils dus davos onns en la scola dil Casti da Löweirberg. Alla fin dalla scolaziun fundamentala va Clemens a Freienbach, nua ch'e fa igl emprendissadi sco entagliader e sculptur. Cun bia premura e bien dun per lavurs da maun s'engascha el plirs onns sin siu mistregn ed ha era la pusseivladad da lu-

vra tier la famiglia Nauer sco fravi. Denteren absolva el aunc ina scola mercantila e dus onns pli tard emprendel lu aunc da tagliacrappa.

Famiglia e clamada

Suenter 8-9 onns egl jester tuorna el a casa e secasescha a Sedrun. Immediat fa el diever da sias qualitads manualas. Ei sedat la pusseivladad da cumprar il luvratori da Giusep Cavegn sut il Coop en. En cuort temps ha el in num excellent per tuttas caussas tecnicas sil sectur da fravi, serrer, installaziuns e pli tard era sco garaschist. Igl onn 1962 baghegia el ina gronda casa cun fravgia, garascha e pliras habitaziuns. Sper sia lavur, ch'e exequiva adina cun bia premura, perseveranza e tschaffen, emblidava el mai il ver humor, eri quei en cuminanza, tiels ses da casa ni era tier la lavur da mintgadi.

Ils 19 da november 1957 ha el giu la ventireivla sort d'astgar sespusar cun la Giuseppa. Ina consorta ch'e suandada il Clemens cun bia carezia e curteseivladad sin sia via dalla veta. Ensemes han els fundau ina famiglia e giu 7 affons, ch'han astgau passentar – e passentan aunc oz – bials dis en ca-sia.

En survetsch dalla cuminanza e cultura

Gia da baul demuossa el grond interess pil problems politics ed economics, en ed ord vischernaunca. Tut specialmein eis el s'occupaus cun ils fatgs da sia patria: «La Cavorgia». En differentas uniuns ed instituziuns s'engascha el pil beinstar dil generaless. Sco grond iniziant per ina via nova da Sedrun a Cavorgia metra el in special engraziamenti pigl interess e la lavur prestada.

Bingleiti engarta ins las qualitads dil Clemens. Igl onn 1973 vegn el elegius el cussegli da vischernaunca, al qual el appartegn buca meins che otg onns. Quei uffeci concludea el sco president dil cussegli. Gest 3 onns ein vargai, dapi ch'il Clemens ei vegnius elegius sco gerau. Cun grond inschign e dun tgamuna el il departement dil scolaresser. In uffeci che pretenda bia sentiment, denton era pazienzia e toleranza. Cun gronda capientyscha ha el adina dumignau tut ils problems che sedattan ozildi.

Ei s'auda perquei d'engraziar per tut la lavur prestada en nossa Val – pil interess politics ed economics, per la cultura ed en special ad el sez – sco persuna –

cun siu caracter, siu agid e las numerosas bialas uras en sia cumpignia.

La catscha

Buca tralaschar da menziunar astgan ins la catscha. Aunc il settember vargau ha el passentau ina bellezia catscha el miez da ses collegas dall'uniuon da catschadurs Badus. In catschadur cun tgierp ed olma, gie, gliez era il Clemens. El ch'ha adina giu tut specialas relaziuns tier las muntognas, tier la natira nostra patria. In um da humor, plein forza ed anim. El cueva mo pauc ruaus a sesez. Per el eran las vacanzas sia catscha, leu nua ch'e respirava e secalmava. Forsa ha nies Tuttupussent regalau ad el per la davosa ga ina catscha magnifica per compleina contentientscha. Buca per nuot ha il Clemens giu la cuida da sittar in dils bials taurs ella Val Tujetsch.

Cun egls ed ureglias tedlavan ins sias raquintaziuns, specialmein da siu examen da catscha. «La sera avon ch'ir a catscha seigi el serendius a Mustér tier il signur Desax per absolver ils examens pretendi. Cun patenta seigi el puspei turnaus a casa e l'auter di ius a catscha. Sut la Pulanera hagi el entupau igl emprem catschadur – e quel seigi staus tut surtaus da siu cumparer sco catschadur. Bingleiti catta il Clemens ad agur in bi taur, denton hagi il versau catschadur saviu perschuyader el ch'e seigi in buca lubiu. Cun franc pass hagi el bandunau il catschadur – e premira in siet ed il bi taur seigi curdaus entras la buis da siu collega».

Ils davos dis da catscha eis el secasaus enta Mila, nua ch'e possedeva ina bein endrizzada tegia. Aunc ils davos dis da sia veta ha el raquintau da Milar e dils bials dis ch'e ha astgau passentar en leu.

Per la fin

Malsauns ei il Clemens maina staus. Perquei eis ei stau aschi grev per el da stuer far enconuschientscha cun ina malsogna maligna che tucca quei um spir lavur. – Memia baul eis el spartius da nus. Ina largia en nies miez vegn adina a regurdar nus vid'nies car convischin. Ils 29 da schaner eis ei vegnius surdaus alla tiara benedidä: El ha finiu sia cuorsa e retschiert la paga celestia. Il Segner detti al defunct il ruaus perpeten! – Alla famiglia en malencurada vegli il Segner dar la forza e la ferma carientscha da purtar la dolur.